

FRAMLEGG TIL FORSKRIFT FOR JOTUNHEIMEN NASJONALPARK I LOM, VÅGÅ OG VANG KOMMUNAR I OPPLAND FYLKE, LUSTER OG ÅRDAL KOMMUNAR I SOGN OG FJORDANE FYLKE

Fastsett ved kgl.res. av 5.desember 1980 med heimel i lov av 19.juni 1970 nr. 63 om naturvern § 3 jfr. § 4 og § 21, § 22 og § 23. Fremja av Miljøverndepartementet. Endra 7.mai 1982 nr. 803, 18. juli 1991 nr.484, 24.oktober 2003 nr. 1263, 2.november 2004, 16. november 2004. Endra xxxxxx med heimel i lov 19. juni 2009 nr. 100 om forvaltning av naturens mangfald (naturmangfaldlova) § 34 jf. § 35 og § 62.

§ 1 AVGRENSING

Verneområdet berører følgjande eigedomar:

Lom kommune:	Leir- og Bøverdalen statsallmenning
Vågå kommune:	Langmorkje statsallmenning
	Del av sameige under gnr./bnr. 2/1, 2/2, 3/1
	Gjende (vatnet, eigar av Vågå kommune)
	Russvatnet (eigar gnr./bnr 143/1)
Vang kommune:	gnr./bnr. 6/267
Årdal kommune:	Årdal vestre statsallmenning
Luster kommune:	Luster austre statsallmenning

Nasjonalparken dekkjer eit totalareal på ca. 1151 km². Av dette ligg ca. 919 km². i Oppland fylke og ca. 232 km². i Sogn og Fjordane fylke.

Grensene for nasjonalparken går fram av vedlagte kart i målestokk 1:100.000 (eller større), datert Miljøverndepartementet2010. Dei nøyaktige grensene for nasjonalparken skal merkjast opp i marka. Knekkpunkta skal koordinatfestast.

Verneforskrifta med kart skal oppbevarast i kommunane Lom, Vågå, Vang, Årdal og Luster, hos Fylkesmannen i Oppland og Fylkesmannen i Sogn og Fjordane, i Direktoratet for naturforvaltning og i Miljøverndepartementet.

§ 2 FORMÅL

Formålet med nasjonalparken er å verne eit vilt, eigenarta, vakkert og i stor grad urørt fjellandskap med geologiske førekomstar, dyre- og planteliv og kulturminne på overgangen mellom austlandsk og vestlandsk fjellnatur.

Ålmenta skal ha høve til naturoppleving gjennom utøving av naturvenleg friluftsliv med liten grad av teknisk tilrettelegging.

I nasjonalparken er det innafør ramma av vernereglane høve til å utøve landbruk, friluftslivturisme, jakt og fiske, undervisning og forskning.

§ 3 VERNEREGLAR

1. Landskapet

1.1 Vern mot inngrep i landskapet

Området er verna mot inngrep av alle slag, herunder oppføring av varige eller mellombelse bygningar, , gjerde, anlegg og innretingar, riving av bygningar, parkering av campingvogner, bubilar, maskiner og liknande, opplag av båtar, vegbygging, bergverksdrift, vassdragsregulering, fjerning eller øydelegging av inventaret i grotter, graving, utfylling og lagring av masse, sprenging og boring, bryting av stein, mineralar og fossil og fjerning av større stein og blokker, drenering og anna form for tørrlegging, nydyrking, bakkeplanering, framføring av luft- og jordleidningar, bygging av bruer og klopper, oppsetting av skilt, opparbeiding og merking av stiar, løyper o.l. Opplistinga av tiltak er ikkje uttømmende.

1.2 Reglane i pkt. 1.1 er ikkje til hinder for:

- vedlikehald av eksisterande bygningar , anlegg og innretingar som ikkje fører til bruksendring. Vedlikehald omfattar ikkje ombygging eller utviding. Vedlikehald skal skje i samsvar med tradisjonell byggeskikk og tilpassast landskapet.
- vedlikehald av eksisterande stiar, merking, bruer, skilt og liknande
- vedlikehald av eksisterande vegar i samsvar med forvaltningsplan
- kvisting av løyper i medhald av forvaltningsplan
- slått og rydding av eksisterande settrar og setervollar i samsvar med forvaltningsplan
- opplag av båtar i samsvar med forvaltningsplan
- drift og vedlikehald av eksisterande energi- og kraftanlegg og nødvendig istandsetting ved akutt utfall, jf forvaltningsplan.

1.3 Forvaltningsstyresmakta kan gi løyve til:

- a. ombygging og mindre utviding av eksisterande bygningar
- b. oppføring av nye bygningar og av innretningar som er naudsynte for drifta av turisthytter i nasjonalparken i samsvar med forvaltningsplan
- c. gjenoppføring av bygningar, anlegg og innretningar som er øydelagde ved brann eller naturskade
- d. bygging av bruer og legging av klopper
- e. oppsetting av skilt, vegvisarpilar, merking av nye stiar og kvisting av nye løyper.
- f. oppsetting av gjerde
- g. større endringar i seterdrifta i samsvar med forvaltningsplan
- h. oppføring av bygningar i medhald av fjellovas § 35 i samsvar med forvaltningsplan
- i. bruksendring av eksisterande bygningar
- j. oppgradering/fornyng av kraftanlegg og kraftlinjer
- k. riving av bygningar, anlegg og innretningar og oppføring av nye med same størrelse og for same bruk i samsvar med forvaltningsplan.
- l. opplag av nye båtar

Ombygging, utviding og nybygg skal skje i samsvar med lokal tradisjonell byggeskikk når det gjeld utforming, fargar og materialbruk, og skal tilpassast landskapet.

2. Plantelivet

2.1 Vern av plantelivet.

Vegetasjonen, herunder daude buskar og tre, er verna mot all skade og øydelegging. Såing og planting av tre og annan vegetasjon er forbode.

2.2 Reglane i 2.1. er ikkje til hinder for:

- a. bruk av området til beite
- b. skånsam bruk av trevirke til å brenne bål
- c. plukking av bær og matsopp
- d. plukking av vanlege planter til privat bruk
- e. vedhogst til brensel i kraft av gamle bruksrettar etter tilvising frå forvaltningsstyresmakta

2.3 Forvaltningsstyresmakta kan gi løyve til

- a. hogst av ved til turisthytter, andre hytter og setrar i nasjonalparken
- b. omplanting og såing i samband med revegetering

2.4 Regulering av beite.

Direktoratet for naturforvaltning kan ved særskilt forskrift regulere beiting som kan skade eller øydelegge naturmiljøet.

3. Dyrelivet

3.1 Vern av dyrelivet.

Dyrelivet, herunder hi, reir, trekkruter, hekke-, yngle- og gyteplassar er freda mot skade og unødvendig uroing. Utsetting av dyr og organismar på land og i vatn er forbode. Kalking i vassdrag må ha særskilt løyve.

3.2 Reglane i pkt 3.1 er ikkje til hinder for:

- a. jakt, fangst og fiske i samsvar med gjeldande regelverk.
- b. felling av store rovdyr i samsvar med gjeldande regelverk

3.3 Forvaltningsstyresmakta kan gi løyve til:

- a. utsetting av fisk frå lokale fiskestammer der dette er gjort tidlegare.
- b. kalking av vatn og elver som er naudsynt for å hindre at ein art døyr ut. Det skal gjennom forvaltningsplanen fastsetjast eit referanseområde som ikkje kan kalkast.

4. Kulturminne

4.1 Vern av kulturminne

Kulturminne skal vernast mot skade og øydelegging. Lause kulturminne kan ikkje flyttast eller fjernast. Riving og flytting av bygningar som kan ha kulturell eller historisk verdi krev løyve frå forvaltningsstyresmakta.

4.2 Forvaltningsstyresmakta kan gi løyve til:

Istandsetting, vedlikehald og skjøtsel av kulturminne

5. Ferdsel

5.1 Generelt om ferdsel

All ferdsel skal skje varsamt og ta omsyn til vegetasjon, dyreliv og kulturminne.

5.2 Organisert ferdsel

Reglane i denne forskrifta er ikkje til hinder for organisert turverksemd til fots så lenge naturmiljøet ikkje blir skadelidande.

Organisert ferdsel som kan skade naturmiljøet, t.d. større treningsopplegg, jaktprøver, militærøvingar og andre øvingar, redningsøvingar, arrangement og konkurransar, må ha særskilt løyve av forvaltningsstyresmakta. Det same gjeld ferdselsformer som kan skade naturmiljøet. Nærare retningslinjer vert gjeve i forvaltningsplan

5.3 Sykling og organisert bruk av hest

Sykling og organisert bruk av hest er tillate på vegar. Det kan i forvaltningsplan fastsetjast trasear, stiar og område som er godkjende for slik bruk i forvaltningsplanen.

5.4 Regulering av ferdsel

Innafor nærare avgrensa delar av nasjonalparken kan Direktoratet for naturforvaltning ved særskilt forskrift regulere eller forby ferdsel som kan skade for naturmiljøet.

5.5 Omlegging av stiar

Av omsyn til naturmiljøet, herunder villrein og anna dyreliv, beitedyr, reindrift, og for tryggleiken når dette kan gå ut over naturmiljøet, og kulturminne kan forvaltningsstyresmakta leggje om eller krevje fjerna merking av stiar og løyper.

5.6 Generelle unntak for ferdsel

Reglane i pkt. 5 gjeld ikkje naudsynt ferdsel ved gjennomføring av militær operativ verksemd og tiltak i samband med ambulans-, politi-, brannvern-, rednings- og oppsynsverksemd, samt gjennomføring av skjøtsel- og forvaltningsoppgåver bestemt av forvaltningsstyresmakta.

6. Motorferdsel

6.1 Forbod mot motorferdsel

Motorferdsel er forbode på land og vatn, herunder start og landing med luftfartøy, og i lufta mindre enn 300 meter frå bakken

Parkering og lagring av motorkøyretøy, luftfartøy og motorbåtar i nasjonalparken kan berre skje i samband med løyve til motorferdsel eller etter særskilt løyve frå forvaltningsstyresmakta.

6.2 Reglane i pkt 6.1 er ikkje til hinder for

- motorferdsel i forbindelse med militær operativ verksemd, politi-, rednings-, brannvern-, skjøtsel-, oppsyns- og forvaltningsoppgåver bestemt av forvaltningsstyresmakta. Regelen gjeld ikkje øvingskøyring.
- lågflyging under 300 m over bakken dersom akutte vørtilhøve gjer det naudsynt av omsyn til tryggleiken.
- bruk av båt med motor på inntil 10 hk på Gjende i samband med bruksrett fastbuande/busette i Vågå og Lom har til beiting, setring og fiske i desse områda, jf forvaltningsplan, og i samband med storviltjakt. Maks. hastigheit med motorbåt på Gjende er 8 knop.
- bruk av båt med motor inntil 6 hk på Russvatn og Bessvatn i samband med bruksrett fastbuande/busette i Vågå og Lom har til fiske og beiting i desse områda. Maks. hastigheit på Russvatn og Bessvatn er 8 knop.
- bruk av båt med motor på Gjende og Bessvatnet i samband med transport og tilsyn med beitedyr og i samband med oppsyn og fiskekultur som vert drive av Vågå og Lom fjellstyre.
- motorferdsel på vinterføre, på vegen i Gravdalen eller med luftfartøy i samband med tilsyn og vedlikehald av Hydro A/S sine reguleringsanlegg i Utladalsområdet.
- motorferdsel på vegen i Gravdalen i samband med inspeksjon av kraftanlegg og i samband med naudsynt henting og ettersyn av beitedyr, jf reglar vedtekne av Direktoratet for Statens Skoger 10. mai 1979.
- motorferdsel for uttransport av sjuke eller skadde bufe i medhald av lov om dyrevelferd. Kjøretøy som nyttast skal vere skånsamt mot markoverflata. Det skal gis melding til ansvarleg oppsyn for verneområdet i forkant av kjøring.

6.3 Forvaltningsstyresmakta kan gi løyve til:

- øvingskøyring til formåla som er nemnde i pkt 6.2a.
- motorferdsel på vinterføre, på veg eller med luftfartøy i samband med husdyrhald, tamreindrift, vedhogst og utøving av bruksrett med fiskekultivering.
- bruk av beltekjøretøy på vinterføre eller luftfartøy for transport av brensel, proviant, varer og utstyr til turisthytter, hytter og setrar.
- motorferdsel på Glitterheimsvegen for transport av brensel, proviant, varer og utstyr til Glitterheim turisthytte.
- bruk av beltekjøretøy på vinterføre eller luftfartøy for transport av materialar til vedlikehald og byggearbeid på bygningar, bruer, anlegg og innretningar.
- transport av personale til drift av turisthytte, i samsvar med forvaltningsplan.
- drift av rutebåt på Gjende i samsvar med forvaltningsplan.
- bruk av motorbåt på Gjende for drift av turisthytter i samsvar med forvaltningsplan.
- bruk av motorbåt med inntil 10 hk på Gjende for hytteeigarar med hytte ved Gjende innafor nasjonalparken.

- j. Forvaltningsstyresmakta kan gje løyve til høgare hastigheit enn 8 knop for bruk av motorbåt på Gjende, jf forvaltningsplan
- k. bruk av beltekøyretøy på vinterføre for utføring av sikringstiltak, t.d. merking og kvisting av løyper.
- l. bruk av traktor på traktorveggar for transport av varer og utstyr til drifta av turisthyttene Memurubu og Gjendebu.
- m. transport av faste gjester 2 gonger i veka på vinterføre til turisthyttene Memurubu, Gjendebu og Glitterheim i samsvar med forvaltningsplan.
- n. oppkøyring av skiløype på Fanaråkbreen i samsvar med forvaltningsplan.
- o. køyring på barmark med traktor eller beltekøyretøy i samband med vedlikehald og reparasjon av kraftanlegg til Memurubu.
- p. motorferdsel på vegen i Gravdalen etter pkt. 3 i reglar vedtekne av Direktoratet for Statens Skoger 10. mai 1979.
- q. Bruk av snøskuter eller luftfartøy for utplassering av fangstredskaper og åte for store rovdyr etter pkt. 1.3 m.
- r. Bruk av snøskuter i samband med snømålingar

7. Ureining

7.1 Forbod mot ureining

All slags ureining og forsøpling av vassdrag og naturen er forbode. All bruk av kjemiske midlar som kan påverke naturmiljøet er forbode. Avfall og overskotsmateriell skal takast med ut av området.

7.2 Forvaltningsstyresmakta kan gi løyve til:

- a. bruk av sand o.l. til snøsmelting
- b. kompostering av organisk materiale

7.3 Støy

Unødvendig støy er forbode. Det er ikkje tillate å bruke motordrivne modellfly, modellbåt, o.l.

8. Gamle rettar.

Bruksrettar og allmenningsrettar etter fjellova av 6. Juni 1975 nr. 31 kan utøvast i den grad dei ikkje kjem i konflikt med vernereglane for nasjonalparken

§ 4 GENERELLE DISPENSASJONSREGLAR

Forvaltningsstyresmakta kan gjere unntak frå forskrifta dersom det ikkje strir mot formålet med vernevedtaket og ikkje kan påverka verneverdiane nemneverdig, eller dersom omsynet til tryggleik eller omsynet til vesentlege samfunnsinteresser gjer det naudsynt, jf. naturmangfaldlova § 48.

§ 5 FORVALTNINGSPLAN MV

Det skal utarbeidast ein forvaltningsplan med nærare retningslinjer for forvaltning, skjøtsel, tilrettelegging, informasjon osv. Forvaltningsplanen skal godkjennast av Direktoratet for naturforvaltning.

§ 6 SKJØTSEL

Forvaltningsstyresmakta, eller den forvaltningsstyresmakta avgjer, kan setje i verk tiltak for å oppretthalde eller oppnå den natur- og kulturtilstanden som er formålet med vernet.

§ 7 FORVALTNINGSSTYRESMAKT

Direktoratet for naturforvaltning fastset kven som er forvaltningsstyresmakt for verneforskrifta.

§ 8 RÅDGIVANDE UTVAL

I kvar kommune som har areal i nasjonalparken skal det vere tilsynsutval for den del av nasjonalparken som ligg i vedkommande kommune. Direktoratet for naturforvaltning fastset mandat for utvala.

Det kan verte oppretta eit felles rådgjevande utval for forvaltninga av nasjonalparken og Utladalen landskapsvernområde med representantar frå alle tilsynsutvala og andre berørte partar.

§ 9 IKRAFTTREDING

Denne forskrifta trer i kraft straks.

FRAMLEGG TIL FORSKRIFT FOR UTLADALEN LANDSKAPSVERNOMRÅDE I LUSTER OG ÅRDAL KOMMUNAR I SOGN OG FJORDANE FYLKE

Fastsett ved kongelig resolusjon av 5.12.1980 med heimel i lov av 19. juni 1970 nr. 63 om naturvern § 5 og 6, jfr. §§ 21, 22 og 23. Fremja av Miljøverndepartementet. Endra xxxxxx med heimel i lov 19. juni 2009 nr. 100 om forvaltning av naturens mangfald (naturmangfaldlova) § 34 jf. § 36 og § 62.

§ 1 AVGRENSING

Landskapsvernområdet omfattar delar av statsallmenningane Årdal austre og Luster austre og delar av følgjande gnr./bnr.:

Luster kommune: Gnr./bnr.: 8/1, 2, 3, 5, 9/1, 4, 16, 10/1, 11/1, 2, 12/1, 2, 3, 4, 5, 6,
13/1, 3, 4, 5, 20, 22, 38, 14/1, 2, 3, 5.

Årdal Kommune: Gnr./bnr.: 11/1, 12/1, 2, 13/1, 2, 3, 4, 5, 14/1, 2, 3, 4, 15/6, 16/1, 2,
3, 4, 6, 17/1, 3, 18/1, 2, 19/1, 22/2.

Det samla arealet er på ca. 314 km²

Grensene for landskapsvernområdet framgår av vedlagte kart i målestokk 1:100.000, datert Miljøverndepartementet 5. desember 1980. Dei nøyaktige grensene for landskapsvernområdet skal avmerkast i marka. Knekkpunkta skal koordinatfestast.

Verneforskrifta med kart skal oppbevarast i Årdal kommune, Luster kommune, hos Fylkesmannen i Sogn og Fjordane, i Direktoratet for naturforvaltning, og i Miljøverndepartementet.

§ 2 FORMÅL

Formålet med landskapsvernområdet er å verne eit vilt og vakkert vestlandslandskap med naturmiljø, kulturlandskap og kulturminne i tilknytning til Jotunheimen nasjonalpark.

Ålmenta skal ha høve til naturoppleving gjennom utøving av naturvenleg friluftsliv med liten grad av teknisk tilrettelegging.

I landskapsvernområdet er det innafør ramma av vernereglane høve til å utøve landbruk, friluftslivturisme, jakt og fiske, undervisning og forskning.

§ 3 VERNEREGLAR

1. Inngrep i landskapet

1.1 Området er verna mot alle inngrep som vesentleg kan endre eller verke inn på landskapet sin art eller karakter.

Med dei unntaka som følgjer av forskrifta pkt 1.2 og 1.3 er det forbod mot inngrep som vegbygging, oppføring og ombygging av varige eller mellombelse bygningar, gjerde, anlegg og innretningar, parkering av campingvagnar, bubilar og maskiner, bergverksdrift, vassdragsregulering, graving og påfylling av masse, sprenging og boring, bryting av stein, mineralar og fossilar, uttak og fjerning av større stein og blokker, drenering og anna form for tørrlegging, nydyrking, nyplanting, bakkeplanering, framføring av luft- og jordleidningar, bygging av bruer og klopper, oppsetting av skilt, opparbeiding og merking av stiar, løyper o.l. Kulturminne skal vernast mot skade og øydelegging. Opplistinga er ikkje uttømmende.

Fylkesmannen avgjør i tvilstilfelle om eit tiltak kan endre landskapet sin art eller karakter vesentleg.

1.2 Reglane i pkt. 1.1 er ikkje til hinder for:

- drift av gardsbruka Vetti, Lauvhaugen og Flaten, herunder den turistnæringa som vert driven der. Driftsendringar som kan ha vesentleg innverknad på landskapets art eller karakter, skal godkjennast av forvaltningsstyresmakta.
- vedlikehald av bygningar, anlegg og innretningar, herunder kraft- og telefonleidningar. Vedlikehald omfattar ikkje ombygging eller utviding. Vedlikehald skal skje i samsvar med tradisjonell byggeskikk og tilpassast landskapet.
- vedlikehald av eksisterande stiar med merking, skilt, bruer og liknande i samsvar med forvaltningsplan.
- kvisting av løyper i samsvar av forvaltningsplan.
- drift og vedlikehald av kulturlandskap i samsvar med godkjend forvaltningsplan og/eller skjøtselsplan.
- vedlikehald av Vettisvegen mellom Skår og Vetti.
- drift og vedlikehald av eksisterande energi- og kraftanlegg og naudsynt istandsetting ved akutt utfall, jf forvaltningsplan.

1.3 Forvaltningsstyresmakta kan gi løyve til:

- ombygging og utviding av eksisterande bygningar.
- oppføring av mindre bygningar og innretningar som er naudsynte for drift av turisthytter i landskapsvernområdet.
- gjenoppføring av bygningar, anlegg, steinmurar og innretningar som er gått tapt ved brann eller naturskade.
- bygging av bruer og legging av klopper.

- e. merking av nye stiar, oppsetting av skilt og vegvisarpilar og kvisting av nye løyper.
- f. riving av bygningar som pregar landskapet sin art eller karakter.
- g. utviding av eksisterande og oppføring av nye bygningar, gjerde, anlegg og innretningar som er naudsynte for jordbruk og skogbruk.
- h. uttak av sand til eigen bruk.
- i. naudsynte tiltak i landbruket, så som oppføring av sanketrø, sperregjerde, taubane m.v.
- j. oppføring av bygningar i medhald av fjellovas § 35 i samsvar med forvaltningsplan.
- k. oppføring av ei hytte på Vettismorki, tilhøyrande Vetti gard, jf. foredrag til kgl.res.05.12.1980.
- l. istandsetting av seterhus i samsvar med forvaltningsplan.
- m. uttak av masse for vedlikehald av Vettisvegen.
- n. oppgradering/fornyng av kraftanlegg og kraftlinjer.
- o. riving av bygningar, anlegg og innretningar og oppføring av nye med same størrelse og for same bruk i samsvar med forvaltningsplan.

Ombygging, utviding og nybygg skal skje i samsvar med lokal tradisjonell byggeskikk når det gjeld utforming, fargar og materialbruk, og skal tilpassast landskapet.

2. Plantelivet

2.1 Beskyttelse av plantelivet

Plantelivet skal vernast mot skade og øydelegging. Innføring av nye planteartar er forbode.

2.2 Beite

Beiting er tillate. Direktoratet for naturforvaltning kan ved forskrift regulere eller forby beiting som skader landskapets art og karakter.

2.3 Høgst av ved

Høgst av ved til eigen bruk og til hytter, setrar i landskapsvernområdet er tillate når dette vert gjort som plukkhøgst.

Urskogprega furuskog og hole tre og stammar som er eigna som buplass for fuglar, må likevel ikkje fellast.

2.4 Forvaltningsstyresmakta kan gi løyve til:

- a) høgst når dette er naudsynt for å ivareta kulturlandskapet i medhald av forvaltningsplan/skjøtselsplan
- b) høgst av materialar til vedlikehald av bygningar

3. Dyrelivet

3.1 Jakt, fangst og fiske

Jakt, fangst og fiske i samsvar med gjeldande regelverk er tillate.

3.2 Forvaltningsstyresmakta kan gi løyve til:

Forvaltningsstyresmakta kan gi løyve til:

- a) utsetting av fisk frå lokale fiskestammer der dette er gjort tidlegare.
- b) kalking av vatn og elver som er naudsynt for å hindre at ein art døyr ut. Det skal gjennom forvaltningsplanen fastsetjast eit referanseområde som ikkje kan kalkast.

4. Kulturminne

4.1 Vern av kulturminne

Kulturminne skal vernast mot skade og øydelegging. Lause kulturminne kan ikkje flyttast eller fjernast. Riving og flytting av bygningar som kan ha kulturell eller historisk verdi krev løyve frå forvaltningsstyresmakta.

4.2 Forvaltningsstyresmakta kan gi løyve til:

Istandsetting, vedlikehald og skjøtsel av kulturminne

5. Ferdsl

5.1 Generelt om ferdsl

All ferdsl skal skje varsamt og ta omsyn til vegetasjon, dyreliv og kulturminne.

5.2 Organisert ferdsl

Organisert ferdsl som kan skade naturmiljøet og dermed endre landskapets særpreg eller karakter vesentleg, t.d. større treningsopplegg, jaktprøver, øvingar, arrangement og konkurransar, og ferdslsformer som ikkje skjer til fots må ha særskilt løyve frå forvaltningsstyresmakta dersom det kan skade naturmiljøet.

Nærare retningslinjer vert gjeve i forvaltningsplanen, jf. § 5.

5.3 Sykling og organisert bruk av hest

Sykling og organisert bruk av hest er tillate på vegar. Det kan i forvaltningsplan fastsetjast trasear, stiar og område som er godkjende for slik bruk i forvaltningsplanen.

5.4 Regulering av ferdsel

Innafor nærare avgrensa delar av nasjonalparken kan Direktoratet for naturforvaltning ved forskrift regulere eller forby ferdsel som ikkje skjer til fots og som kan skade naturmiljøet.

5.5 Omlegging av stier

Av omsyn til naturmiljøet villrein og anna dyreliv, og for tryggleiken når dette kan gå ut over naturmiljøet, og kulturminne kan forvaltningsstyresmakta leggje om eller krevje fjerna merking av stiar og løyper.

5.6 Generelle unntak for ferdsel

Reglane i pkt. 4 gjeld ikkje naudsynt ferdsel ved gjennomføring av militær operativ verksemd og tiltak i samband med ambulanse-, politi-, brannvern-, rednings- og oppsynsverksemd samt gjennomføring av skjøtsels- og forvaltningsoppgåver bestemt av forvaltningsstyresmakta.

6. Motorferdsel

6.1 Forbod mot motorferdsel

Motorferdsel er forbode på land og i vatn, herunder start og landing med luftfartøy, og lågtflyging under 300 m over bakken..

Parkering og lagring av motorkøretøy, luftfartøy og motorbåtar i landskapsvernområdet kan berre skje i samband med løyve til motorferdsel eller etter særskilt løyve frå forvaltningsstyresmakta.

6.2 Forbodet i punkt 5.1 gjeld ikkje:

- a) motorferdsel ved militær operativ verksemd, politi-, rednings-, brannvern-, skjøtsel-, oppsyns- og forvaltningsoppgåver bestemt av forvaltningsstyresmakta. Regelen gjeld ikkje øvingskjøring.
- b) lågtflyging under 300 m over bakken dersom akutte vêrtilhøve gjer det naudsynt av omsyn til tryggleiken
- c) motorferdsel på innmark i forbindelse med drift av jordbruksareal
- d) bruk av snøscooter i samband med tamreindrift
- e) helikoptertransport av sjuke/skadde dyr i medhald av lov om dyrevern. Det skal gjevast melding til ansvarleg oppsyn i verneområdet i forkant av kjøring .
- f) motorferdsel på Vettisvegen i samsvar med "Reglar for Vettisvegen" vedtekne av Årdal kommunestyre 17.11.1977
- g) motorferdsel på vegen i Gravidalen i samsvar med reglar vedtekne av Direktoratet for statens skoger 10. mai 1979. For motorferdsel som handsamast etter pkt. 3 i desse reglane, skal også forvaltningsstyresmakta godkjenne motorferdsel.
- h) motorferdsel i Vettisområdet under utøving av landbruksdrift,
- i) motorferdsel på vinterføre, på vegane i Gravidalen og Koldedalen eller med luftfartøy i samband med tilsyn og vedlikehald av Hydro a/s sine reguleringsanlegg
- j) motorferdsel på den delen av vegen inn Koldedalen som ligg mellom dei 2 bruene over Koldedøla
- k) bruk av beltekjøretøy på vinterføre eller luftfartøy for tilsyn med 22 kV høgspennelinje (vest for Tyin) mot rapport i ettertid
- l) motorferdsel for uttransport av sjuke eller skadde bufe i medhald av lov om dyrevelferd. Kjøretøy som nyttast skal vere skånsamt mot markoverflata. Det skal gis melding til ansvarleg oppsyn for verneområdet i forkant av kjøring.

6.3 Forvaltningsstyresmakta kan gi løyve til

- bruk av båt med motor, beltekjøretøy på vinterføre, bil på Koldedalsvegen og Vettisvegen eller luftfartøy i samband med

- a) øvingskjøring som er nemnd under pkt. 5.2.a
- b) husdyrhald
- c) vedhogst
- d) uttransport av felt elg og hjort og rein
- e) fiske
- f) transport av varer, brensel, proviant og utstyr inn til turisthytter, hytter og setrar
- g) transport av materialar til vedlikehald og byggearbeid på bygningar, anlegg og innretningar
- h) transport av personale for drift av turisthytter, jf forvaltningsplan
- i) skogsdrift som er godkjent i medhald av pkt 2.4
- j) utføring av sikringstiltak, t.d. merking og kvisting av løyper.

7. Ureining

7.1 Forbod mot ureining

All forsøpling og bruk av kjemiske midlar som kan påverke naturmiljøet er forbode. Avfall og overskotsmateriell skal takast med ut av området.

7.2 Forvaltningsstyresmakta kan gi løyve til:

- a) bruk av sand og liknande til snøsmelting
- b) kompostering av organisk materiale

7.3 Støy

Unødvendig støy er forbode. Det er ikkje tillate å bruke motordrivne modellfly, modellbåt, o.l.

8. Andre rettar

Bruksrettar og allmenningsrettar etter fjellova av 6. Juni 1975 nr. 31 kan utøvast i den grad det ikkje kjem i strid med vernereglane.

§ 4 GENERELLE DISPENSASJONSREGLAR

Forvaltningsstyresmakta kan gjere unntak frå forskrifta dersom det ikkje strir mot føremålet med vernevedtaket og ikkje kan påverka verneverdiane nemneverdig, eller dersom omsynet til tryggleik eller omsynet til vesentlege samfunnsinteresser gjer det naudsynt, jf. naturmangfaldlova § 48.

§ 5 FORVALTNINGSPLAN

Det skal utarbeidast ein forvaltningsplan med nærare retningslinjer for forvaltning, skjøtsel, tilrettelegging, informasjon mv. Forvaltningsplanen skal godkjennast av Direktoratet for naturforvaltning.

§ 6 SKJØTSEL

Forvaltningsstyresmakta, eller den forvaltningsstyresmakta avgjer, kan setje i verk tiltak for å oppretthalde eller oppnå den natur- og kulturtilstanden som er formålet med vernet.

§ 7 FORVALTNINGSSTYRESMAKT

Direktoratet for naturforvaltning fastsetter kven som er forvaltningsstyresmakt for landskapsvernområdet.

§ 8 RÅDGIVANDE UTVAL

I kvar kommune som har areal i landskapsvernområdet skal det vere tilsynsutval for den del av landskapsvernområdet som ligg i vedkommande kommune. Direktoratet for naturforvaltning fastset mandat for utvala.

Det kan verte oppretta eit rådgjevande utval for som er felles for forvaltninga av landskapsvernområdet og Jotunheimen nasjonalpark, med representantar frå alle tilsynsutvala og andre berørte partar.

§ 9 IKRAFTTREDING

Denne forskrifta trer i kraft straks.